

# Rosakkan pintu bakeri, bekas pekerja dipenjara empat bulan

**SIBU:** Seorang bekas pekerja bakeri dijatuhi hukuman penjara empat bulan oleh Mahkamah Majistret di sini semalam atas kesalahan melakukan khianat dengan merosakkan pintu kayu bakeri tempat dia bekerja sebelum ini.

Muhammad Saidatul, 30, yang mengaku bersalah terhadap pertuduhan itu, diperintah oleh mahkamah menjalani hukuman penjara itu bermula dari tarikh dia ditahan, 13 November 2024.

Saidatul terdahulu didakwa melakukan khianat dengan merosakkan pintu kayu sebuah bakeri di Lorong Tun Ahmad Zaidi Adruce 28A pada 13 November 2024, jam lebih kurang 1.05 petang.

Sehubungan itu, tertuduh telah melakukan kesalahan di bawah Seksyen 425 Kanun Keseksaan dan dihukum di bawah Seksyen 426 kanun yang sama, di mana sabit kesalahan boleh dihukum sehingga lima tahun atau denda atau kedua-duanya sekali.

Berdasarkan fakta kes,

pada hari kejadian, pengadu sedang dalam bakeri apabila seorang lelaki masuk dan mula mengganggu pekerjaanya.

Lelaki tersebut yang dikenali sebagai tertuduh kemudian naik ke bilik rehat pekerja di tingkat atas serta bertindak merosakkan barang di bilik tersebut.

Pengadu yang ketakutan kemudian mengunci pintu bilik sebelum tertuduh bertindak menendang pintu menyebabkannya pecah serta rosak.

Pengadu kemudian menghubungi pihak polis dan tertuduh ditahan di hadapan bakeri pada hari sama, kira-kira jam 1.30 petang.

Antara barang yang rosak termasuk sebuah meja, sebuah mesin pembuat roti, dinding serta pintu kayu, dengan kerugian dianggarkan sebanyak RM2,450.

Siasatan yang dijalankan mendapati tertuduh merupakan bekas pekerja bakeri terbabit dan telah berhenti bekerja pada bulan Mei tahun lepas.